


錢錄



十三



				漢書門類
		二六六〇		
	一三四			
八九				
冊	架	函	號	類

庫文閣內			
五	二六六〇		漢書類
八			
架	冊	號	類


內閣文庫			
番號	漢	2660	
冊數		8 (6)	
函號	295	70	







欽定錢錄卷十二

右遼太祖天贊通寶錢按遼耶律阿保機於後梁末帝貞明二年稱神冊元年至龍德二年改元天贊遼史食貨志鼓鑄之法先代撒刺的爲夷离堇以土產多銅始造錢幣太祖襲而用之遂致富強以開帝業






右二品篆文奇古洪志謂不知年代今按亦天贊二字特左文讀耳




右穆宗應曆重寶錢遼史穆宗本紀天祿五年九月丁卯即位改元應曆今按是歲辛亥為後周太祖廣順元年也




右景宗乾亨元寶錢按景宗保寧十一年改元乾亨是為宋太宗太平興國四年食貨志景宗以舊錢不足於用始鑄乾亨新錢錢用流布






右聖宗太平元寶錢乾亨四年聖宗即位改元統和二十九年改開泰開泰元年改元太平則宋真宗天禧五年也按食貨志聖宗鑿大安山取劉守光所藏錢散諸五計司兼鑄太平錢新舊互用





右太平興寶錢與前元寶錢正相類曰興寶者或如石晉之天福鎮寶別為一種背文丁字疑即聖宗之太平七年歲在丁卯也洪志讀作大興平寶義未安




右興宗重熙通寶錢按宋仁宗明道元年為遼興宗景福元年次年遼改元重熙興宗本紀重熙二十二年閏七月己亥長春州置錢帛司




右道宗錢五種凡六枚大康有通寶元寶二品按道宗以重熙二十四年即位改元清寧清寧十年冬改明年為咸雍咸雍十年冬改明年為大康大康十年冬改明年為大安大安十年冬改明年為壽隆食貨志言道宗之世錢有四等曰咸雍曰大康曰大安曰壽隆皆因改元易名而言清寧今此錢具在則清寧中蓋亦嘗鼓鑄而史書軼之也



右天祚帝乾統天慶錢各一按天祚帝壽隆七年即位羣臣上尊號曰天祚皇帝改元乾統乾統十年改元天慶則宋徽宗政和元年也食貨志天祚之世更鑄乾統天慶二等新錢



右西遼壽昌錢按李季興東北諸蕃樞要云契丹天祐年號壽昌今考天祐帝則西遼耶律大石也據天祚帝紀百官冊立大石為帝號萬兒罕復上漢尊號曰天祐皇帝改元延慶無壽昌紀元之說豈正史失之而樞要所云或別有據歟至洪志引北遼通書曰天祚即位壽昌七年云云壽昌蓋壽隆之誤耳



右小大二品舊譜及洪志俱謂不知朝代今自右及上讀之曰感天元寶按天祐帝在位二十年遺命皇后權國稱制號感天皇后此錢蓋其時所鑄也




右千秋萬歲錢董道曰亦遼國錢遼宋通使時其國人頗攜此錢入中國



右一種穿下字曰二右文近天字左文不可識規制篆體類天贊錢疑亦初遼所鑄




右大千通寶錢通寶二字倒書之亦見洪志右文丁字與太平興寶錢同



右千字錢李孝美曰體如遼錢疑其同出今併附於遼代諸錢之後





右夏仁宗天盛元寶錢按夏人慶六年改元天盛時則南
宋高宗之紹興十九年而金煬王之天德元年也



右金煬王正隆元寶錢按煬王天德五年改貞元貞元四
年改正隆則宋紹興之二十六年也食貨志金初用遼宋
舊錢天會末雖劉豫之阜昌錢亦用之至正隆二年閱四
十餘歲始議鼓鑄三年中都置錢監二京兆置監一三監
鑄錢文曰正隆通寶輕重如宋小平錢與舊錢通用






右世宗大定通寶錢背文曰申曰酉亦紀年也正隆六年世宗即位改元大定按史大定十年令戶部流通官錢十五年諭宰臣增鑄新錢十八年代州立監鑄錢其文曰大定通寶文字肉好又勝正隆之制又二十年名代州監曰阜通又二十二年設官提控阜通監又二十三年以節度領監事又二十七年曲陽縣鑄錢別爲一監以利通爲名又二十八年京府及節度州增置流泉務蓋金代鼓鑄惟是時最盛






右章宗泰和大錢按宋寧宗慶元七年爲章宗泰和元年食貨志稱泰和四年八月鑄大錢一直十篆文曰泰和重寶與鈔並行此錢是也蓋章宗即位罷鑄錢承安二年鑄銀名承安寶貨一兩至十兩分五等每兩折錢二貫尋以私鑄多寢不能行亦罷之至是始鑄錢計自明昌改元以來凡十二年無置監鑄錢之事

欽定錢錄卷十二


欽定錢錄卷十三






右元武宗錢二品前一品曰至大通寶楷書後一品曰大元通寶西番篆書按食貨志武宗至大三年初行錢法立資國院泉貨監以領之其錢曰至大通寶者一文準至大銀鈔一釐曰大元通寶者一文準至大通寶錢一十文




右順帝至正通寶錢凡三種以次遞小前一種及最小一種背文西番篆讀作巴納蓋梵語錢字也其第二種背文上一字亦西番篆讀作額下楷書曰二蓋當二耳按史元世交鈔寶鈔皆印造錢文無鼓鑄之事惟武宗一置監鑄錢然仁宗皇慶元年卽下詔廢不行所立院監悉皆罷革而專用至元中統鈔順帝至正十年丞相脫脫始復建議開鑄置寶泉提舉司鑄至正錢與交鈔通用謂子母相權顧所鑄不能流通至其後乃並鈔亦不行所在郡縣皆以物貨相貿易公私所積之鈔人視之若廢楮蓋自錢法敝而鈔法亦壞矣




右明太祖大中通寶大錢按明會典太祖初置寶源局於應天鑄大中通寶錢及平陳友諒命江西行省置貨泉局頒大中通寶錢大小五等錢式此其大錢也明太祖始建國號意在大中旣而祈天乃得大明故當時錢文有此蓋未紀元以前自稱吳王時所鑄耳








右太祖洪武通寶錢五品凡六枚背文曰十曰五錢曰三錢二錢一錢按會典太祖卽位令戶部及各行省鑄洪武通寶錢其制爲五等當十錢重一兩當五重五錢當三當二重如其當之數小錢重一錢首二枚背文又浙字福字蓋各行省所記如唐會昌錢制也



右洪武通寶小錢按洪武四年改鑄小錢此錢背無文較前五等式小錢稍重而肉好更工緻




右成祖永樂通寶錢按會典永樂九年鑄




右仁宗洪熙通寶錢



右宣宗宣德通寶錢按會典宣德九年鑄



右英宗正統通寶錢




右英宗天順通寶錢




右憲宗成化通寶錢




右孝宗宏治通寶錢按會典宏治十六年鑄



右世宗嘉靖通寶錢按會典嘉靖六年題准鑄造嘉靖通寶錢事例七年鑄嘉靖通寶錢又差官於河南閩廣鑄造嘉靖通寶錢三十四年題准雲南鑄錢事例四十四年寶源局鑄嘉靖錢其時所鑄錢有金背火漆鏃邊三種又按嘉靖三十二年令照新式鑄洪武以下紀元九號錢云云今考仁宗英宗憲宗諸朝其鼓鑄事蹟悉別無明文然則以上洪熙正統天順成化等錢蓋皆嘉靖時所補鑄而景泰以出廟遂獨無錢文也



右穆宗隆慶通寶錢按會典隆慶四年鑄考明初沿宋元之舊錢鈔互用至宏治後多用銀而鈔法不行惟俸錢獨支鈔如故至是時始以新鑄隆慶錢給京官俸云



右神宗萬曆通寶錢按會典萬曆四年命戶工二部准嘉靖錢式鑄萬曆通寶錢金背火漆一文重一錢二分五釐錠邊一文重一錢三分又命十三布政司南北直隸俱聞局鑄錢




右光宗泰昌通寶錢按萬曆四十八年八月丙午朔光宗即位詔以明年為泰昌元年九月乙卯朔熹宗即位詔以明年為天啓元年改萬曆四十八年八月為泰昌元年光宗之立甫閱一月此錢或熹宗即位後所鑄然是否前未改天啓故仍稱泰昌也






右熹宗天啓通寶錢二品小者制如泰昌錢大者背文穿
上有十字旁曰一兩按是時兵部尚書王象乾請鑄當十
當百當千三等大錢仿白金三品之制於是兩京皆鑄大
錢後有言大錢之弊者詔南京停鑄大錢收大錢發局改
鑄則此錢旋鑄旋罷固未嘗行使也



右莊烈帝崇禎通寶錢二品微有小大按是時定錢式每
文重一錢每千直銀一兩南都所鑄輕薄乃定每文重八
分此二錢是也



右崇禎通寶大錢背文有監字五字按莊烈帝末年勅鑄當五錢此錢蓋當五



欽定錢錄卷十三

文政三

